

Shan Morgan  
Yr Ysgrifennydd Parhaol  
Llywodraeth Cymru

14 Gorffennaf 2020

Annwyl Ysgrifennydd Parhaol,

Diolch i chi am ddod i gyfarfod y Pwyllgor Cyfrifon Cyhoeddus gyda'ch swyddogion ar 6 Gorffennaf.

O ganlyniad i gyfyngiadau amser, roedd sawl cwestiwn nad oeddem wedi gallu eu gofyn ac fe ddwedais y byddwn yn ysgrifennu atoch yn eu cylch. Mae'r cwestiynau hynny wedi'u rhestru isod.

#### Y Gwasanaeth Sifil a lles staff

1. O ystyried y pwysau, faint o risg sydd y bydd staff Llywodraeth Cymru – gan gynnwys yr Uwch-dîm Arweinyddiaeth neu chi eich hunan, yn gorweithio? Sut ydych chi'n lliniaru'r risg hon, a pha gamau ydych chi'n eu cymryd i wneud yn siŵr bod staff ar draws Llywodraeth Cymru yn cymryd gwylliau blynyddol?

#### Archwilio Mewnol

2. A allwch chi roi'r wybodaeth ddiweddaraf am yr adolygiad o waith yr adran Archwilio Mewnol yn 2020–21: a yw hwn wedi'i gwblhau; beth oedd y prif ganfyddiadau ac a yw Llywodraeth Cymru wedi cadw digon o adnoddau yn y tîm craidd i gyflawni'r gwaith hwn?
3. Sut fydd Llywodraeth Cymru yn rheoli'r achosion o wrthdaro buddiannau o ganlyniad i adleoli staff Archwilio Mewnol i gyflawni rolau gweithredol? Sut fydd hyn yn effeithio ar gapasiti'r adran Archwilio Mewnol ar gyfer 2020–21 a'r blynyddoedd sydd i ddod?



**Senedd Cymru**  
Bae Caerdydd, Caerdydd, CF99 1SN

 [SeneddArchwilio@senedd.cymru](mailto:SeneddArchwilio@senedd.cymru)

 0300 200 6565

**Welsh Parliament**  
Cardiff Bay, Cardiff, CF99 1SN

 [SeneddPAC@senedd.wales](mailto:SeneddPAC@senedd.wales)

 0300 200 6565

---

## **Mynediad at ddata – Cronfa Ddata Cyllid a Thollau EM**

4. Nid oes gan Lywodraeth Cymru fynediad at y gronfa ddata. Beth yw eich asesiad o effaith hynny ar y broses arfarnu o ran hawliadau grant? Faint o amser staff fyddai wedi'i arbed pe bai swyddogion wedi cael fynediad, a pha gamau ydych chi wedi'u cymryd i gael fynediad at gronfa ddata Cyllid a Thollau EM?

## **Cefnogi ac ariannu sefydliadau eraill: Awdurdodau Lleol**

5. Sut fydd Llywodraeth Cymru yn cael sicrwydd ynghylch y grantiau Covid-19 a weinyddir gan awdurdodau lleol, a sut fydd hi'n gwerthuso eu heffaith?

## **Cefnogi'r Economi**

6. Cyhoeddodd Airbus achosion sylweddol o golli swyddi yn ei ganolfan ym Mrychdwn yr wythnos diwethaf. Mae Gweinidog yr Economi, Trafnidiaeth a Gogledd Cymru wedi cyhoeddi datganiad ar y camau sy'n cael eu cymryd i ymateb i'r argyfwng y mae'r diwydiant awyrofod yng Nghymru yn ei wynebu. A allwch chi roi'r wybodaeth ddiweddaraf am y camau hynny, a chamau Llywodraeth Cymru, i gefnogi'r diwydiant awyrofod yng Nghymru yn y dyfodol?

## **Dysgu gwersi**

7. A allwch chi roi'r wybodaeth ddiweddaraf am ganlyniadau'r Ymateb i'r Arolwg ynghylch yr Argyfwng, y cyfeiriwyd ato yn eich llythyr dyddiedig 1 Mehefin?

## **Llacio'r cyfyngiadau ac adferiad yn dilyn Covid-19**

8. Mae Llywodraeth Cymru wedi pwysleisio'r pwysigrwydd – o ran iechyd y cyhoedd a hyder y cyhoedd – bod sectorau'n agor yn ddiogel. Beth oedd rôl Llywodraeth Cymru a Maes Awyr Caerdydd fel ei gilydd o ran hediadau Ryanair a adawodd ddydd Gwener 3 Gorffennaf o Faes Awyr Caerdydd i Malaga a Faro, cyn codi'r gofyniad i aros yn lleol, a chodi'r cyfyngiad ar deithio nad yw'n hanfodol, a sut mae'r risgiau iechyd cyhoeddus cysylltiedig wedi'u rheoli?
9. Soniwyd yn y cyfryngau bod Llywodraeth Cymru wedi gwario dros £11 miliwn ar barc busnes Bryn Cegin ym Mangor, sydd wedi aros yn wag am 20 mlynedd. A allwch chi egluro beth yw cynlluniau Llywodraeth Cymru ar gyfer dyfodol y parc busnes, ac a oes potensial iddo gael ei ddefnyddio i ysgogi adferiad economaidd ar ôl Covid-19?



---

## Camau gweithredu ar ôl y cyfarfod

### 'Profi, Olrhain, Diogelu'

Cytunwyd yn y cyfarfod y byddai Dr Andrew Goodall yn anfon rhagor o wybodaeth atom am y dull gwerthuso ar gyfer y system olrhain cysylltiadau – Profi, Olrhain a Diogelu.

### Oriau gwaith staff a gwyliau blynyddol

Wrth ystyried y dystiolaeth a ddaeth i law, gofynnodd yr Aelodau hefyd i mi ysgrifennu atoch i ofyn am wybodaeth am oriau gwaith staff Llywodraeth Cymru, a gwyliau blynyddol. A fydddech cystal â rhoi data dienw inni sy'n dangos faint o wyliau blynyddol a gymerwyd gan staff Llywodraeth Cymru rhwng 1 Mawrth a 30 Mehefin 2020, wedi'u dadansoddi yn ôl gradd ac yn ôl rhywedd, ac wedi'u gosod yn erbyn yr un data ar gyfer y cyfnod 1 Mawrth – 30 Mehefin 2019? Byddai'n dda petai'r data hwnnw hefyd yn cynnwys faint o ddiwrnodau nad ydynt yn ddiwrnodau gweithio, a phenwythnosau, a weithiwyd gan staff fesul eu gradd.

### Cyrff a Noddir gan Lywodraeth Cymru

Yn y cyfarfod gofynnodd yr Aelodau am eich asesiad o'r effaith ar golli masnach ac incwm arall nad yw'n incwm oddi wrth y Llywodraeth, ar Gyrff a Noddir gan Lywodraeth Cymru, yn ystod y pandemig a pha gymorth ariannol a gynigiwyd iddynt, neu a fydd yn cael ei gynnig iddynt. Fe ddywedoch wrth y Pwyllgor fod Gweinidogion wedi trafod goblygiadau gostyngiadau yn y gyllideb gyda'r cyrff sydd wedi'u noddi, cyn cyhoeddi'r gyllideb atodol gyntaf, ac y byddai Llywodraeth Cymru yn gweithio gyda Chyrff a Noddir gan Lywodraeth Cymru yn y flwyddyn sydd i ddod i'w cefnogi yn y broses o wneud penderfyniadau.

Ar 9 Gorffennaf 2020, dywedodd Prif Weithredwr Cyfoeth Naturiol Cymru wrth Bwyllgor Newid Hinsawdd, yr Amgylchedd a Materion Gwledig y Senedd, fod ei adolygiad wedi nodi pwysau o ran costau, a cholli incwm, a bod diffyg posibl o £15 miliwn yn ei gyllideb, o ganlyniad. Er bod Llywodraeth Cymru wedi darparu £5 miliwn o gyllid cyfalaf ychwanegol, yn ôl y sôn roedd Cyfoeth Naturiol Cymru yn defnyddio cronfeydd wrth gefn yn sgîl gwerthu pren yn flaenorol, a'i fod wedi nodi arbedion o £8.8 miliwn i fynd i'r afael â'r bwlch o ran cyllido.

Hoffem gael gwybodaeth am Gyrff a Noddir gan Lywodraeth Cymru sy'n profi gostyngiadau sylweddol mewn incwm masnach neu gyllid nad yw oddi wrth y Llywodraeth, cyrff fel Cyfoeth Naturiol Cymru, HEFCW a Chwaraeon Cymru, o ganlyniad i Covid-19. Beth yw hyd a lled yr anawsterau y maent yn eu hwynebu, a ydyn nhw'n rhoi gwybod am newidiadau o ran eu costau o ganlyniad i'r pandemig, sut maen nhw'n ymateb



---

a pha gefnogaeth sy'n cael ei chynnig gan swyddogion Llywodraeth Cymru (gan gynnwys yr Uned Cyrff Cyhoeddus)?

### **Ganolfan Confensiynau Rhyngwladol Cymru**

Ar 9 Gorffennaf 2020, ac yn dilyn y cyfarfod, cyhoeddodd sefydliad y Celtic Manor a Chanolfan Confensiynau Rhyngwladol Cymru raglen o golli swyddi, o ganlyniad i'r pandemig a'r cyfyngiadau cysylltiedig ar gyfer y sectorau lletygarwch a thwristiaeth. Disgwylir y bydd 450 o staff yn colli eu swyddi o blith y gweithlu parhaol o 995 aelod o staff. Byddem yn croesawu gwybodaeth am asesiad Llywodraeth Cymru o ran pa mor agored yw'r Ganolfan i risg ariannol o ganlyniad i'r cyhoeddiad hwn a'r amodau economaidd ehangach. A ydych wedi newid gwerth neu ddsbarthiad unrhyw rwymedigaethau cysylltiedig ac os felly, a wnewch chi roi'r manylion?

Edrychaf ymlaen at gael eich ateb.

Yn gywir,



**Nick Ramsay AS**  
**Cadeirydd**

Croesewir gohebiaeth yn Gymraeg neu Saesneg | We welcome correspondence in Welsh or English.

